

0 10 20 30 40 50 60 70 80 90 100 110 120 130 140 150 160

Inches
1
2
3
4
5
6
7
8
9
10
11
12
13
14
15
16
17
18
19
20
21
22
23
24
25
26
27
28
Centimetres

678.085
895

Kodak Color Control Patches

咸豐三年春刊

范忠貞奉誼

板藏涵碧舫

范忠貞年譜

平湖柯汝霖編

公諱承謨字觀公號螺山瀋陽人先世有文正忠宣

相繼為宋室名宰相父文肅公諱文程字見斗天命

二年明萬歷四十五年見

太祖高皇帝於撫順偉其貌詢知家世謂諸貝勒曰此名臣

後也天聰三年明崇禎二年從征有功時官文館尙未有

大學士職銜而文肅所領皆樞密事生六子長達禮

次即公也三承勳四承斌五承烈六承祚

太宗文皇帝天聰九年乙亥明崇禎八年公生

范忠貞年譜

水月老人客遊關東嘗寓文肅公家見公異之輒撫
其頂曰是兒當建節吾土吾猶及見之老人姓孫名
文字文石號
水月會稽諸生隱於杭榜所居為梅園性恬靜一介
不取間為長短歌詞問其年嘗稱九十髮盡禿人多
以僧呼之

崇德元年丙子

明崇禎
九年二歲

是年改六館為內三院文肅公陞秘書院大學士每
議大政必資籌畫

二年丁丑三歲

三年戊寅四歲

四年己卯五歲

五年庚辰六歲

是年就傅讀書畫壁遺稿云髫歲從師學鉅儒置懷
口授互伊吾故容忽入連宵夢猶囑綱常爾善扶蓋
公以名教為己任自其就傅之時已然矣

六年辛巳七歲

七年壬午八歲

八年癸未九歲

是年

世祖章皇帝即位文肅公撥隸鑲黃旗

世祖章皇帝順治元年甲申十歲

三月闖賊陷明北京明山海關總兵吳三桂來乞師
先是文肅公建議曰乃者有明流寇踞於西土水陸
諸寇環於南服兵民煽亂於北陲我師燮伐其東鄙
四面受敵此正諸王建功立業之會也竊惟成丕業
以垂休萬禩者此時失機會而貽悔將來者亦此時
今日當申嚴紀律秋毫無犯復宣諭以昔日不守內
地之由及今進取中原之意官仍其職民復其業錄
其賢能恤其無告如是則大河以北可以傳檄定也
河北一定移各官吏妻室避患於我軍因以爲質又
拔其德譽素著者置之班行則見聞可廣而政事有

時措之宜矣此行或直趨燕京或相機攻取當於長
城以西擇堅城屯兵爲門戶我師往來斯便惟攝政
諸王察之至是遂召文肅於湯泉決策進兵時抱病
力疾趨

朝建議曰自闖寇猖狂中原塗炭近且傾覆京師戕厥
君后此必討之賊也雖擁衆百萬橫行無憚揆其敗
道有三逼隕其主天怒矣刑辱搢紳拷劫財貨士忿
矣掠民貲淫人婦火人廬舍民恨矣備此三敗行之
以驕可以一戰破也我

國家上下同心兵甲選練誠聲罪以臨之恤其士夫拯

厥黎庶兵以義動何功不成復言好生者天之德也
兵者聖人不得已而用之自古未有嗜殺而得天下
者

國家欲統一區夏非又安百姓不可四月大軍遂發文
肅扶病隨征二十二日敗闖賊兵二十萬於山海關
我兵長驅而西民皆安堵師入燕京議先為明帝發
喪易梓宮備儀衛文肅親紀其事

二年乙酉十一歲

三年丙戌十二歲

公讀書每有心得嘗讀諸葛武侯出師表至鞠躬盡

力死而後已慨然歎慕其為人

四年丁亥十三歲

五年戊子十四歲

是時公三弟承勳承斌承烈並同公讀書

公有少攜三弟誦詩

書之句

妹婿佟康年表兄李之粹暨其弟之華讀書公家

康佟

年名晉公漢軍與公同里文肅公之婿累官廣東巡撫公殉難後晉公祭以文云丙兄少負異質迥然絕羣弟也與兄同里同居又復重之以婚媾申之以盟好得陪兄鍵關讀書未嘗一日離李之粹字長白文肅公之甥公之表兄也公有懷李長白侍御詩云幼同筆硯長同朝珥筆形廷事舜堯

六年己丑十五歲

公性純孝嫡母太夫人遭疾旦夕親奉侍藥飲衣帶
不解者浹旬

七年庚寅十六歲

八年辛卯十七歲

是年

上親大政公以元勳子選充侍衛

詔免入直扈從仍令在家讀書大慶賀入班行禮

秋以茂秀應制科領鄉薦考官鄂公名密圖阿公名
密達俱滿洲人李公名中白山西人孫公名自式江
南人

九年壬辰十八歲

二月會試中式改庶吉士考官胡公名統虞湖廣人
成公名克鞏直隸人陳公名泰劉公名清俱奉天人

十年癸巳十九歲

十一年甲午二十歲

授宏文院編修公讀書翰林院猶間日入侍

詔免扈從顯意肄業益肆力典文

十二年乙未二十一歲

擢秘書院侍讀學士

十三年丙申二十二歲

十四年丁酉二十三歲

十五年戊戌二十四歲

十六年己亥二十五歲

十七年庚子二十六歲

公官中秘時惟喜積書留心經濟

十八年辛丑二十七歲

陞國史院學士

聖祖仁皇帝康熙元年壬寅二十八歲

二年癸卯二十九歲

陞內閣學士公數以體弱善病不任職文肅公趣之

嚴力疾入署常詢其每飯幾何強以能飯對然實不
飯也

三年甲辰三十歲

公以多病力求解任辭至再始得請畫壁遺稿自序

云先太傅在日

今皇帝尚冲齡一日余與同官進 內請 寶

上詢曰爾誰氏子爾父何官今在否年幾何余悉具先太傅

始末以對

上喜曰爾若子耶如此者數四後值 朝賀期先太傅入賀

上指問左右而不名但曰此非某官乎且稱說

祖宗朝往事甚詳左右皆驚為異數余解任後代余者同衆

入內

上問曰此為誰范承謨何久不見閣臣奏曰承謨病解任矣
此其代者

上曰果病耶劇耶病愈尙起用耶對曰病須調治一痊卽補
上領之者再先太傅聞

宸注如此感激益深故亟圖報稱之語時加訓督

是年公第承勳授工部員外郎承勳字銘公一字蘇公由廕生入國子監

讀書

四年乙巳三十一歲

先是公伯兄達禮充浙東援勦總兵官嗣

廷議撤援勦諸路兵達禮因之燕邸

達禮字胄卿公有伯兄舞象我方生

之句是胄卿醫者沈陞詔偕來

沈陞詔武林人父燿長公十四歲

太醫院吏目著有攝生指南集有文夫子五人陞詔其長也能紹世業胄卿專闡括蒼延請幕中至是偕之燕邸

五年丙午三十二歲

七月十五日闔族燕集東臯文肅公謂公兄弟曰吾

家世受

國恩爾等乘年力富强宜速補官為

國家効力中外勿以予老為念申諭再三東臯為文肅公別業每燕

息時集親朋子姪觴詠於此有抱甕亭程君其相題額公有東臯泛月詩

八月初二日丁父文肅公憂順治十八年九月吏部議准在京部院滿洲蒙

古漢軍大小文官例應照定例守制一月服滿卽出理事

九月服滿補秘書院學士

六年丁未三十三歲

派分教庶吉士充纂脩

世祖章皇帝實錄副總裁官

七月

上躬親大政加意民瘼公在內院每見必垂問章疏中有報水旱災荒者否有則必檢以對

七年戊申三十四歲

是年公弟承勳遷刑部郎中充

大清會典纂脩官

冬浙江巡撫缺人

廷推及公

上色喜諭曰浙江東南要地國計民生悉委爾矣可善爲之

公居

禁近久雖謹默自持然庸心治理於利弊休戚所關瞭如指掌

上旣親大政思得貞廉以風天下首擢用之公亦毅然以匡

濟爲已任

八年巳酉三十五歲

正月如塚莊公有和壁間韻調寄踏莎行一闕結有及時功就賦歸來休休莫把韶光誤之句

二月抵浙受事

十八日聞浙督趙廷臣之訃公祭以文云余童時卽聞海內有君鄰先生爲當代儀表筮仕以及今日垂二十年而未嘗一日通殷勤公歷任巖疆威惠並著卒之日巷空聞走軍民奔號之聲徹晝夜禮臣修勞臣故實行且器錫後園公亦可云無憾獨是浙當水

陸衝衢疊更水旱民困於賦吏病於貪兵逞於驕俗刁於訟余方望公左提右挈得借手以告臨軒而營

頭星隕哲人云亡此東南半壁之失其禔福也

趙廷臣字

君鄰奉天之鐵嶺人順治二年知山陽縣招集流民均徭緩賦歲大稔出賞易粟以賑多所全活山寇王希榮據鎮安執縣令置寨中勢甚熾君鄰單騎造之諭以禍福希榮遂降並挈鎮安令以歸至是爲浙江總制因閱視海疆積勞病故

五月劾奏貪官汙吏故事制撫受事三月後得劾奏不法吏及期兩司列狀以白公閱而哂曰是欲吾舍豺狼而問狐狸耶還之翼日忽拜疏一時墨吏皆列白簡中諸僚吏無不驚懼

七月疏請另定逃人處分

按浙故多巨猾與營卒相約結擇人而食莫可嚮邇
公曰糧莠不除嘉禾不茂若輩皆大爲民受害者廉得
其實悉立置重典間有一二逋誅亦盡室走他方終
公任內未敢一涉里門也蓋逃人一項奸民視爲利
藪公嚴爲禁止以甦民困其惠澤之及人深矣

十月請蠲逋賦

浙東諸郡強半阻山瀕海田多磽确或斥鹵彌望舊
稱瘠土以故逋賦日懸總督趙公爲之請蠲於

朝部議方在駁查適趙公病故公忽於舊案中得當日

會題原稿立檄藩司速行查覆剋日繕疏入

告諸吏曰此非本衙門原件今新督已

廷推有人不一二月可泄事宜聽之公曰逋賦日懸賠
累日多而民之逃亡者日益衆民方旦夕不堪命尙
可計日以待耶再爲

請復奉

旨該撫親行查勘

九年庚戌三十六歲三月如浙東踏勘荒地奏豁免
荒田地二十九萬四千六百餘畝水衝缺額田地二
萬一千九百餘畝公於二十五日戒途省車徒減飲

饌裁供給隨行者不過步卒數人凡山陬海澨葺屋窮檐足迹可履者無不躬至所至之處焚香迎接者相屬於道迨暫憇郵亭或偶息樹蔭山農獻脫粟飯公受食之父老稚子相對語以故民隱畢達

按公浙東道中作詩有汗雨不離三伏天蠟屐已穿八千路亦可想見其勞瘁矣

六月杭州嘉興湖州紹興諸府被水公回省疏請勘災

是年自春徂夏淫雨連綿六月十二等日颶風暴雨山水下注湖流逆衝浙東西千里田廬汨沈餓殍滿

野公有詩云滿地榛蕪成草昧稽天崩潰竟洪荒蓋實錄也

七月如嘉湖二郡親行勘災

公減從輕舟遍行踏勘災民扶老攜幼告蠲告賑者日以萬計

八月疏請改折錢糧每石折銀一兩

九月請發庫銀採買平糶

公既得請卽檄藩司發庫銀八萬兩乞糶吳楚兩省不兩月米艘銜尾而至公乃下平糶之令先以所入者償司庫迨司庫補完而所羨者尙餘強半用以全

活民命故歲雖苦稔而民忘其饑

十二月請開事例救荒

公以佃戶窮民最多最苦非大賑濟斷難安生因思浙省所援納捐助河工之銀先儘賑饑以甦百萬垂斃之民疏入格於部議不行

按是年洪水為災公苦心焦思轉運公私積粟二百餘萬石飛檄守令酌道里設廠賑濟縉紳富室有好事行其德者任自為之遠近蒸蒸聞風響應公獨駕小舟往來諸郡邑親歷郵墟阡陌間瘞骸骨招流亡問疾苦恒徒跣行泥淖中足為之腐賑畢而歲且週

十年辛亥三十七歲正月疏請緩徵漕折銀兩

嘉湖二郡被災已深重者顆粒無收輕者斗石不繼入冬以來又雨雪連綿飢寒滿路折漕一項追呼盡術收納無多公察其實請俟蠶熟之後催徵起解統於康熙十年歲終奏報

二月至海鹽覆文衛田駐節張羅浮侍御涉園

公駐節累旬長歌以紀其勝有句云主人又復出山去定寫流民進朝宇猿鶴今遺三徑空却使忙人等

閒住則是時羅浮已入

都矣

羅浮名惟赤順治乙未進士累官給事中

數上章奏悉中時務以掌工科卒於官涉園在海鹽南門外即烏夜郵基羅浮父大白先生讀書處羅浮

創造此園內有十六
景為鹽邑之勝地

三月如泉公亭

公率僚屬舍於亭側黃氏之志在堂嘗登亭周覽風
土詢民間疾苦公有泉公僧舍題壁詩云三月春光
澹碧山恰來花發又花殘忙中歲月驅馳盡海上風
雲指顧間杜老漫吟歸馬逸莊生徒羨白鷗還茆庵
一宿仍卑濕未許浮生半日閒及去庠生黃納臣泰
陸宗石培泰昆季偕里中士民送公至平湖今志在
堂有聯
云庭前草木知生意海上風雲寫壯懷
後書培風堂主人題贈蓋公墨跡也
公至平湖憇陸鶴田侍御桂山堂

公賦桂山堂詩贈侍御有句云吾之東行正春莫營

田日走湖橋路主人為我破蒼苔相攜直到林深處

時當牡丹花盛開臨時尚有九英梅小橋箕踞坐相

得鬚眉照水無塵埃鶴田名光旭順治壬辰進士知
保定縣大水決隄繼以大疫鶴

田請免被災田賦仍罄已貲煮粥以賑擢御史去復
請免霸州及文安保定通糧後轉冀南道聞保定復
雇水滌遣人持金分
給貧民民立祠祀之

五月疏請織造局採辦絲斤

湖州府屬額辦南北絲斤每年例應需員分解向因
解費不敷僉解官役往往因增給派民累害無休公
察其實請將銀移送織造衙門採辦即於北船附解

而民累悉除矣

七月經畧南湖

公親行勘議實丈今存湖基共五千一百六十四畝

零

南湖分殺茗溪之暴漲
實爲浙西三郡保障

遂至洞霄宮

公題壁詩云諸峰平巾碧璘珣玉井蓮花擁至尊未
到已疑仙佛地重來翻愧宰官身偶尋大滌穿黃竹
爲訪樓真披紫雲忠定紫陽提舉處江南閒殺老謀
臣

夙疾大作疏請解任調理

先是移咨浙閩總督劉君兆麒三來親驗劉君以
朝廷之恩地方之重苦相勸勉不爲代
題至是公拜疏請解任調理

上素悉公有舊疴許之

八月成考言錄一卷

公取在事以來奏疏咨移榜檄之屬擇其稍有關係
者存之名曰考言錄

九月繕疏請早離任調理旋因提督疏請仍留原任
公既辭任浙屬士民聞之巷空間走號呼之聲徹晝
夜總督劉兆麒提督塞白理各疏言浙省年來當荒

做時而生民不致重困者皆撫臣承謨之力今以病請告百姓投詞攀留積一百五十餘紙不敢壅於上聞先是給事中姜希翰柯聳御史何元英等疏言承謨受事三載愛民如子餽遺請謁不通劾奏貪墨廉治巨猾剔除加耗陋規私派積弊單騎勘荒悉心賑恤浙人愛戴深於飢渴今雖積勞致疾懇

特勅勉留奉

旨范承謨委係真病故令回京調理已有旨了該部知道至是提督復疏請

上諭吏部曰前因浙江巡撫范承謨以患病具奏准其回京

調理今據提督等奏稱百姓愛戴號泣請留情詞懇切特順民情仍留原任

十一年壬子五月送太夫人北上

公作西湖十詠其一絕云徘徊堤上自躊躇聞道舟停駱馬湖深恨一官居此地枝頭羞見下飛鳥

六月重脩孤山放鶴亭

公有記文蓋諾道士何規中之請也

七月上緩征議

公以部議徵收錢糧四月完一半九月全完諸司凜

遵

功令不得不於正二月開徵銳意徵比百姓多方借貸
變質完公苟不如限敲扑隨之迨至秋收復有漕白
南軍等米萃於一時償債之外依然赤手及至來春
又接比新糧年復一年民生日蹙請改五月開徵九
月完一半餘令來年二月全完所遲不過一季而百
姓俱免剜肉補瘡之苦
閏七月疏請釐正白糧耗米
浙省徵輸白糧其加耗多寡不一湖州每石加五斗
五升嘉興每石加八斗爲運丁春辦諸費公請嗣後
令糧戶以春白米輸納概限加耗四斗五升

八月鄉試監臨撤棘時統覽諸卷見沈子上墉卷策
對詳明亟召吏繕寫弄之箱帙

九月疏請軫恤蝗災

七月初蝗蝻遍野閏七月淫霖浹旬歸安烏程長興
德清山陰俱遭淹沒小民百方戾救將慶有成而入
月初旬雷雨一宵異蟲遍野杭之仁和錢塘嘉之嘉
興秀水嘉善海鹽平湖石門桐鄉湖之安吉歸安烏
程長興德清武康并紹之蕭山各有被災情形公疾
駕小艇親往察驗見禾稈青黑皆已枯焦穀盡空糝
根俱朽爛如蟻如蝨之細蟲或跳或躍遍滿田中咀

嚙未已洵從來未有之奇災也
疏請改折漕糧每石折銀七錢
十月疏請留浙援納銀兩賑恤杭嘉湖紹四郡饑民
疏請嘉湖二府應完白糧三年帶徵
疏請豁台溫二衛康熙九年以前荒通銀兩及石門
平陽未完輕費月糧
二十七日補授福建總督
公撫浙威惠大孚凡所興革施爲無不克當

上指故一時督撫大僚

陛辭日每正色飭之曰爾欲作好官耶當如范某其得

君如此在浙四載前後疏奏

天子悉俞其所請民無負累以得安其新業

朝廷知公曲體民隱撫民如食疾子而福建邊疆重地

海氛未靖晉公聞督時公以他過鑄級例不准列

聖祖特簡往任

十一月公以福建海疆重任難副具疏控辭不允

按浙雖舊有繁華名然亦屬凋敝之餘公甫駐旆旌

卽申飭條約周晰精詳試畧舉其剔弊則額外之加

派有禁逃人之借攀有禁稅契之重勒有禁頽俗之

溺女有禁吞債之婪息有禁弁伍之漁利有禁畧舉

其利賴則開滌壅水以通委輸給墾蕪田以登禾黍
飭行落甲自運以罄民累酌定官收明效以甦民困
而其所最勞經畫者則災沴頻仍公弗憚跋涉徧歷
阡陌間實閱被災多寡上請蠲恤而又以漕糧難辦
則疏陳折兌省民間十萬金錢稅課難輸則檄諭停
徵免新穀新絲之慮復於額外籌策他方轉移廣市
鄰米拯濟枵腹無算而所尤不及者奉

上諭所頒十六條致治化民之要術爲直講頒示郡邑朔望

講學使民還淳古漸致太平

時魏祥佐浙江幕府所爲奏記告諭公移之文皆出

其手卽今所傳四此堂摘鈔是也

祥一名際瑞字善伯又字伯子號東

房甯都人爲諸生敏捷強記於兵刑農穀禮制律法皆能窮析原委嘗從大帥畧地粵東有游宦將就戮祥力請釋之其後爲方面大吏於其鄉祥適鄉試事畢不通謁知者咸歎其高祥曰高則吾何敢夫吾有恩於人吾豈能忘之哉是固知吾籍里者也不忘當求我不求而吾往其將不見德庶或以漸而怒乎祥諸所論述明於人情不託高名以自飾類皆如此後館總兵折爾肯所以說滇逆將韓大任降爲所害著有文集十卷行世

祥弟禧子世傑並至署中

公有送魏興士歸贛州詩云勾庭已跨揚州鶴興士

重開章貢船

魏禧字冰叔一字叔子明末爲諸生結廬金精之翠微峰與兄祥弟禮爲易堂

學禧才學尤高遂以古文名天下著有勾庭文集二十二卷詩集八卷左傳經世若干卷無子嘗曰吾有

三子左傳經世長子也日錄次子也文集三子也
世傑字興士善伯之子丁巳善伯死於滇逆之難乃
與季父公和夜行八十里往視父殮蓋棺之頃拔佩
刀自刺者再爲人所持遂奮拳搥胸死血結於少腹
目終上視腸腹痛僕不能立踰二
十日遽死著有梓室文稿六卷

公嘗爲水月老人建百步塘

出艮山門外有塘曰百步塘上有水月庵卽水月老
人故居也公撫浙日母太夫人言於公遂物色焉久
之始屏騶往謁談論數四捐俸爲建百步塘勒石紀
之時西溪多虎患老人與公言每日山頭大蟲任打
門內大蟲休惹及遷閩督老人又言曰耳後火發時
須要有主意蓋皆隱語也又手授公摩利支天經云

王難護我賊難護我公後竟死耿難老人素不喜與
世事及是人以爲前知爭就之老人益惡避去不知
所終土人改其居曰水月庵肖老人若僧像召緇徒
奉之爲香火院

十二月疏言閩中一切軍務機宜必須面奉

天語指授方略且臣一得之愚不便形之紙墨又應備陳請
旨庶可仰承

廟略臣願單騎就道星馳

陛見少盡臣子瞻仰之心

十二年癸丑三十九歲正月公有跋宋高宗賜岳武

穆勅

跋云予以巳酉至杭垂今五載每過西湖未嘗不瞻拜墓下邇者爲公加護馬鬣兼裝潢遺容以垂奕世據此則公脩岳王墓當近在壬子歲矣

二月北發

瀕北發浙之人士攀轅號泣如孺子之失父母公駐節慰勞數百里內相繼不絕有瞽者百輩長號舟前曰小人心感公德目不能睹公顏願得進抱公足一摩公衣公矜而許之瞽者泣不止公亦爲之雪涕如是者竟十餘日僚屬皆歎息相顧曰民情感慕若此

爲人上者奈何不法公自効乎

平湖士民感公遺愛請於邑令陳侯孚宸立石以紀陸鶴田侍御爲撰遺愛碑記云湖雖僻壤亦被恩威之帡幪而湖民乃更有獨沾者旌節下賁確核軍田乃從輕舫履畝時與牧豎村農面詢疾苦察邇言以興利除害斯又湖民所親被德施者矣則以全省之頌聲私爲湖邑之頌聲亦奚不可哉

三月二十八日抵雄縣劉可書來會

按公殉難後可書哭以詩云十載幽并慰寂寥吳山忽倦馬蹄還還君相府芙蓉幕老我衡門椰子瓢

觀闕琴書經下里連床風雨話中宵郡知一別成今古
猶謂銷魂在五橋可書嘗從公遊公延課其諸幼弟

公入

觀就晤於雄州旅次卽詩所謂琴書經下里也

劉可書
字長馨

清苑人爲公搜集詩文
詳加校訂彙成全集

四月抵都

入

觀日

上首詢江浙生民疾苦暨經由諸處光景公悉條奏無遺并
口陳軍食欠缺需餉急切情狀次問公病勢何似獎

勞備至公頓首謝且力引疾

上曰卿氣喘語艱且暫休息既出

詔遣御醫李玉白就舍診視賜尙方藥餌旬無虛日

七月以薦舉人才一案爲甯爾講所參公拜疏自請
處分

按康熙八年四月奉

恩詔核舉山林隱逸之士公嚴檄各屬虛公薦舉隨據甯波

府以葛世振應

葛世振鄞縣人明崇禎庚辰第二人翰林院編修

湖州府以

董漢策應而漢策堅不出山未列薦剡世振又旋以

老疾懇辭已經部覆議允至十年十一月又奉

恩詔漢策復經鄉里公舉司道府縣勘詳各官又備列生平
且稱其前撫臣秦世楨按臣杜果等相繼推轂而漢
策廬墓山中不卽應

詔及公察驗水災按部吳興爰訪里人有謂其素履無愆者

有稱其賑災賑貧德及里閭者公旣廉得其實特薦

以科道試用旋被臺參放歸

董漢策湖州布衣尙書份元孫博聞宏覽公殉

難後浙人建祠於孤山董往謁詩云淚灑西臺夢欲

迷怒濤風捲拍長堤天涯渺渺無知己埋劍金庭伴
鶴棲握機密啟意躊躇篋有陰符返五
湖怡悔囊錐猶未試女牆望見夜啼烏

八月疾稍愈時值舉行察典內外官三品以上例令

自陳公因又以病告及

命下仍令速赴新任

陛辭日

上曰閩海氛未靖地方困苦已極爲天下第一煩劇要地卿

廉能素著亦爲天下最故特倚任

賜冠服鞍馬迥異常數

命近侍就庭前宣諭曰此朕時刻所御之服解以衣爾如見

朕也次日入謝

賜晏畢面辭就道初福建總督駐漳州至是將撤靖南藩屬

還京

特命移駐福州公奏攜其家屬

范忠貞年譜

賜蒙古壯勇入十餘人以行

伯兄達禮偕諸弟送公過蘆溝橋

公詩云昔年送第渡桑乾話別酸心判袂難此際滇
中念母弟仙霞哭罷望長安此蓋憶達禮而作也公
又有憶承勲詩云我前南邁病新痊相送悽然囑早
旋世事已非休望我三親獨賴汝身賢按康熙二十
三年五月九卿科道舉天下清廉官承勲與焉二十
五年擢雲貴總督在任六載威惠大行三十二年十
一月

上謁

孝陵承勲近觀米峪口

上諭曰爾係盛京舊人爾父兄累朝効力爾兄又爲國殉節
朕因見爾思及爾兄心爲慘切不見爾八九年矣爾鬚髮
皓白如今因郊外寒冷將朕貂帽貂掛白狐腋袍賜爾此
時更換恐受風寒明日可服之來謝恩

賜御書世濟其美匾額

承烈字彥公累官戶部侍郎著有雛鳳堂集

范青送公別於雄縣之南易水上公時多慷慨憂時

之語

范青上海人

行至山東宿羊留店其夜賜驥忽徂公歎息良久知

馳驅天末終無功也

羊留店相傳爲折臂三公故里

九月過浙迎者一如送者

十月抵閩

公晉秩閩督

命甫下諸墨吏望風解綬去藩下諸將弁故虎而翼者也皆失色相戒曰范公來我輩當自戢遂鼠伏莫敢喘息然其時閩勢已壞福州兵餉缺至三月興泉漳缺至六月公當食不食當寢不寢蓄靴刀一尺置諸床頭燭盡酒闌浩歎數聲引以自擬

十一月上閩省情形疏

疏言閩人活計非耕卽漁一自遷界以來民田廢棄二萬餘頃虧減正供約計有二十餘萬之多我

皇上停止海禁正萬姓甦生之會而閩地仍以臺寨爲界雖云展界懇田其實不及十分之一且臺寨離海尙遠與其棄爲盜藪何如復爲民業閩自禁海以來利孔旣塞是以兵窮民困請照木筏取魚事例容漁戶沿邊採捕每十筏聯爲一甲行以稽查連坐之法其採捕之魚十取其一以充課

請撥現在協餉

請補綠旗額兵

請免緝投誠逃弁許投到宥罪安插本處

十二月疏請興屯請使受餉之士卒墾闢荒地六年後始裁其餉

疏言兵屯之法行將見金錢可省

國用恒足便一也追呼不迫民漸休息便二也防卒變爲土著堅門戶固藩籬便三也有事則戰無事則耕進可攻退可守便四也兵皆溫飽卒盡歡騰分爲臂指聯爲心腹潛戢反側便五也

十三年甲寅四十歲春正月十一日聞吳三桂反於雲南公密上封事請收拾人心

公以錢糧盜案處分太重請復夏稅秋糧以紓民力寬盜案處分以釋株連至於或

賜蠲免或發賑濟或允緩徵統祈

皇上因時制宜分別施恩以收拾天下人心

先是十二年七月平西王疏請撤藩八月差禮部左侍郎折爾肯傳達禮往雲南經理撤兵起行事宜十二月差往貴州備辦夫船芻糗事務郎中黨務禮員外薩穆哈馳驛回京奏稱雲貴總督甘文焜言吳三桂於十一月二十一日殺雲撫朱國治以所部兵反前差往侍郎折爾肯等被留

吳三桂遼東人父襄明崇禎初官錦州總兵三

桂由武舉隨征累擢總兵以守寧遠有功封平西伯
李自成陷京師三桂來我
朝借師擊破之封平西王順治十六年
鎮雲南

時靖南王耿精忠居喪臥病公親往弔慰

精忠自襲父爵驕蹇多不法憚公威望引嫫婭少長

誼執禮甚恭公輒乘間諷諭以大義冀感動其心幕

客嵇留山告公曰昔魏文貞有言寧為良臣毋為忠

臣又語曰神龍見尾不見首公其慎之
順治六年改封懷順王耿

仲明為靖南王十六年三月駐鎮四川十二月移駐

廣西十七年七月移駐福建康熙三年靖南王耿繼

茂請令其子和碩額駙耿精忠赴閩學軍事允之十
年五月靖南王有疾奏以精忠代理藩務六月耿繼
茂卒以其子
精忠襲爵

二月二日幕客許旭以疾辭歸

許旭字九日三吳人性疏率少不拘檢始從公遊公

異之在浙者三閱歲癸丑冬復相挈入閩中途患疾

因而辭公不允入閩二月疾復發因而訣辭至正月

晦日始許之歸酌酒祖行至五更猶未忍已
幕客嵇永仁應

公之聘邑侯吳招集詞客數人餞送同拈踏莎行調

未以憔悴二字限韻詞中有孤城殘角夢帆影裏人

憔悴之句永仁心動及至幕府輒病脅痛號欲絕恐

居不祿之辰歸念頗切舉顛末告公公為解憔悴之

意亦和一詞詞內有云城郭無光村煙失翠瞥然一
見心如醉停驂暫緩入山期哀鴻待爾離憔悴永仁
私謂許子曰言者心之聲也何為作此不祥語許子
亦相對咨嗟知將不免因決情而去卒脫於難

鎮兵以制賊不果行

公假巡海之名欲提輕兵駐上游以遙制之耿逆卽隨遣官來言曰邇日民心稍安訛言稍息恐公遠出又復動搖少頃撫臣劉秉政亦來力阻且爲相約曰某在此久頗能得彼秘密有所聞卽來告共圖報效朝廷斷不敢誤乃公事公曰閩安之行不過一視海口非久期長往旣諸公止余不行亦可靖藩祖孫父子叔姪弟兄世受

天家非常寵遇量無他志若公忠孝自矢肯以

朝廷之心爲心社稷蒼生之福也語竟心輒鬱鬱退而

不能釋劉秉政漢軍正紅旗人初爲直隸雞澤縣知縣順治九年行取授雲南道監察御史十五年遷太僕寺少卿十六年轉左通政尋擢寧夏巡撫康熙五年補福建巡撫附精忠同謀逆後從精忠出降逮赴京道病死

三月十五日耿逆據福州反

康熙十二年七月精忠聞平南王尙可喜將撤藩歸遼東亦具疏請撤得

旨允行十一月吳三桂反

命精忠仍留鎮三桂以書誘之與藩下潛定逆謀至是反耿逆以兵脅公不屈遂幽之

公自計麾下士僅三千人皆習與精忠部曲處脫有

變不足恃乃密檄諸道將以謁新制府爲名各率健
兒前至用折逆謀未及行三月十五日晨公署中關
帝祠神幔空中舉火自燒是月之內檐鵲如驚鼠狀
悉避入屋內厨堂外有貯
水大缶容數十汲者忽然寸裂幕府鎖是日耿逆遣
員詣署跪請曰王守制數月未親軍務今海艘遊蕩
乘滇南多故萌窺伺心訛言愈興衆情愈惑今新奉
固守地方

勅命不敢以私心廢公事願與諸公會商爲護內防外
之策因喪服未釋不便就教敬遣下員促駕左右請
衷甲以從公曰衆寡不敵躁動奚濟未幾巡撫劉秉

政亦至促之同行詢以所商何事近有何消息但支
飾他語雖心竊疑之乃故坦然共轡以示無懼是日
馬過五帝祠其掌扇無風自舞從者竟不能持入逆
邸中覺廊廡殺氣不可以目公知旣陷虎口勢無還
理挺身而前仰天大罵賊衆兵刃環臨重加束縛時
一二狼卒有誤持劉臂者逆黨馬九玉急叱曰不干
巡撫事秉政但俛首無言兩頰微紅而已遂巡間卽
揮之去公噴血切齒醜言痛詆耿逆素憚公威望恐
殺之重民之怒乃拘之隘室

張福建者公部曲也隨公入逆署聞變單刃突圍當

者輒斃力竭被執賊愛其勇欲全之大罵不屈寸磔
死

公絕粒八日舌做脣裂齧肉皆傷罵聲漸微聞者猶
狼藉塞耳瞋目起視閱十日神氣反旺自度不能死
稍進杯水耿逆復遷禁向內峻堵密棘防之益固以
三十三人監守有蒙古人嘛尼者爲僞散騎郎感公
忠義謀使出走事泄將磔之嘛尼大言曰吾寧與忠
臣俱死不願與爾逆賊同生

公絕粒八日其瓣髮爲防視者所斷故公在纍中自
稱髡翁

公舊役王道隆奉使金陵返至延平聞變持刀大呼
自斷其頸未殊復挺刃剖腹而死

賊下幕賓稽永仁於獄永仁字留山號抱犢山農公
延爲記室過仙霞嶺謁關夫子廟禱於神曰余此行
佐范公救民也若萌利欲心必奪吾嗣聞者震悚公
旣被繫永仁迫脅萬端屹不爲動有同郡附逆者爲
顯官製鮮衣遺之永仁裂而擲諸地其人慚赧去

耿逆迫脅幕賓王龍光草安民檄載誘以官爵皆不

從遂械繫之

王龍光字幼譽號耶溪浙江會稽人諸
生公撫浙日延之教其子迨遷閩督隨

至閩逆藩變作波及幕中諸客稽永仁每語之曰予
兩人氣誼最合死之日魂魄猶應戀此無相離也後

果同殉難在獄著養花說
及雜詩五十餘首以見志

沈上章隨公入閩值逆藩之變與嵇永仁約同死既
而偶以事出外俄傳同難諸子死信從雷雨中潛禱
願出踐宿諾遂爲逆黨所縛獻逆邸時鞫者將窮究
章奏事罪及永仁上章厲聲曰范公心事可白天日
豈陰害人者書生更何與焉逆惡其善辨遂并械繫
沈上章字天成江南華亭人遊京師應禮部儒士試
將博徵祿養親不可得上章工詩歌被難後著詩一
卷曰聽鷓鴣又
纂花譜一卷

同時被難有林可棟亦范公客年六十九初欲從公
死用鐵鎖扼喉頸卒不死既又因九十三歲母在戚

黨爲營救得脫於難公與三義士死狀及畫壁諸詩

歌皆賴以傳述

林可棟字能任號西仲福州人著有挹奎樓文集十二卷吳山穀音入卷

耿逆遣逆黨劉秉政說公降公幽禁中忽防卒喧傳

日樞密使相訪公佯問曰是何樞密來訪誰耶及見

徐顧防卒曰原是劉撫軍公械繫被項肘兩卒扶之

下床劉且前且揖方欲有所陳說公奮足力蹴之劉

狼狽失故遂仆地左右掖之以出公笑曰諸逆無道

旋即誅滅余一擊之力似不可少

劉秉政辱偽職公之死與有力焉事

平勒歸京師所過人爭唾其面行至浙浙民競以瓦
礫投之舟幾覆防守者委曲開諭始解散得狼狽遁
去明年劉暴殂洪士銘天道歌序云康熙丁巳七月
十二驟聞閩舊撫軍劉秉政暴殂於是知有天道歌

以志

在械所二年餘日冠

賜冠衣讎母時衣時更寒暑從未更換朔望日奉時憲曆一

册被械北向拜跪

公在難中筮得蒙卦別號曰蒙谷

成百苦吟一卷

公自序云吳門嵇子留山天下士也癸丑秋從予入
閩未數月而予遭異變嵇子與三山林子能任會嵇
王子幼譽華亭沈子天成同罹其難閱今兩載餘矣
嵇子於困鬱中游戲筆墨作百苦七言絕句而三子

依韻答和予讀之不覺泣然心悲率爾勉和略誌一
時同難之情

十五年丙辰四十二歲二月初五日賦武彝曲贈許

鼎

鼎泰寧人充耿逆護衛公被禁時差司監守義公所
爲恒陰左右之凡所存片紙隻字悉爲守藏公集中
所載武彝曲盖指鼎也按公武彝曲序云不見筆硯
者幾三年矣病臥中偶成武彝一曲贈武彝子也思
欲寫出一觀武彝子伺守者團食牕外乃閉戶垂幕
徐出寸管摘汁於片石間恍然如睹故人嗚呼痛哉

孤臣血淚義俠高風於此可以略見

間作詩文無毫楮乃燒梓成炭畫壁得詩文若干首
公自序云其譏刺太毒者左右旋卽塗去前後僅存
若干篇

公以炭書紙上書顏杲卿伯夷蘇武三古人相詢欲
擇一爲決擇地也

九月大兵破仙霞關耿逆將降冀飾辭免死忌公暴
其罪惡十六夜遣逆黨害公

耿劉二逆初謀攜裝泛海繼以衆情弗順始議投誠
禁卒偵知其情密以慰公公笑曰二逆卽投誠終不

免然必殺我以滅口至十六夜半賊果遣逆黨來害
公公時聞變微笑曰今日方畢吾事索

賜冠賊黨呂入者奪而擲諸地復蹴之公怒以械索擗
其頭幾斃乃披衣露頂遙望

闕九叩首曰罪臣奉職無狀死遲矣遂遇害

一時同死者自幕友至隸卒凡五十三人賊聚一坑
瘞之

公遇害嵇永仁仰天大哭曰所以不死者欲從公有
爲也今已矣遂自經死年甫四十同時死者紹興王

龍光松江沈天成潘陽范承譜三人

承譜公族弟明年福建平制府

上其事給銀優恤戊子公子時崇撫廣東疏請陪祀
由是追贈嵇永仁王龍光國子監助教沈天成范承
譜國子監學正並入祠陪祀雍正中勅建祠祀嵇
永仁賜忠節流芳匾額

難既作嵇永仁侍姬蘇瑤青自經於冬青樹下蘇瑤青常

熟入時年十七

公被難前一日泰寧人許鼎預知秘治容骸小婢藏

於家及遇害賊黨焚屍棄山野鼎預往伏匿夜分行

亂石中覓得燼骸負之而歸人迄無知者明年鼎負

骸潛行萬里竟達京師

公既遇害自浙際閩萬里之內家家為位而哭

十六年丁巳七月送公入福建名宦祠

十七年戊午春公櫬北歸奉

特旨受弔於賜第

上遣內大臣三人暨侍從二十人齎大官茶酒哭臨其喪

秋葬於懷柔山北塞下劉可書哭以詩云越嶠歸來

剩此邱國華家乘又何求雲連白石開新兆地近紅

螺是舊游東閣官梅寒抱玉西湖明月靜依秋山阿

零落歸何處萬木蕭蕭客白頭

十八年己未聞人請於

朝建祠烏石山上以祀公

詔所司優議贈兵部尚書加太子少保

命官致祭廕一子入監

公子名時崇字自牧康熙五十三年三月擢閩浙總督

陸見瀕行

上賜御製詩有棟樑祖幹家聲重蘭桂孫枝令譽清之句序云閩浙總督范時崇陸見來京朕每念伊祖爲開創宰輔伊父乃忠義名臣所以待之優重今因回任特書御詩餞送

二十一年壬戌正月耿逆凌遲梟示其子顯祚處斬當諸逆赴曹時公子時崇大呼賊名手刃寸磔其肉

取其心以告於公劉可書詩曰檻車匝路盡王侯繫頸標名揭罪由不向夜郎雄海外却來廷尉望山頭天王奉法申常憲人子提刀報父讐十載立庭揮血淚血花今日濺霜裘

四月

御製碑文

親揮宸翰遜工鐫刻樹之墓道復將墨本

命秘殿裝潢鈐用

御璽

賜給其家

二十三年甲子浙人士追感舊恩建祠以祀公於孤山之麓



同里黃君可悅所居志在堂昔年范忠貞撫浙時嘗因公駐節於此百餘年來甘棠遺愛深入民心余童時卽聞而慕之後讀公遺集并搜采逸事編成年譜一卷黃君見之欣然捐資銀木而爲之訂正者則陳東堂明經也
咸豐三年癸丑二月穀旦平湖柯汝霖誌



